



Fidoyilik —
Vatanga xizmat demak!

2023-yil 2-fevral, payshanba,
13 (23.734)-son

**KUN
HIKMATI**

Noshukurlik
o'z ehtiyojidan
ortiqcha
narsaga umid
bog'lashdir

1913-yil aprel oyidan chiqq boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz

Payariq tumanida 4085 ta tadbirkorlik sub'yekti ro'yxatdan o'tgan bo'lib, hozirda ularning 204 tasi faoliyat ko'rsatmayapti. 355 ta korxonada ishlab chiqarish hajmi kamaygan. 1465 ta tadbirkorlik sub'yekti hisobotlarda "0" hajm ko'rsatgan, 377 tasida bank aylanmasi mavjud bo'lib, "0" hajm bergan.



O'ZGARISHNI ODAMLAR HIS QILISHI ZARUR

Bunga sabab nima? Payariqlik tadbirkorlarga faoliyatini rivojlantirishi uchun davlat tashkilotlari qanday amaliy ko'mak ko'rsatmoqda?

Tuman hokimligida viloyat hokimi E.Turdimov rahbarligida o'tkazilgan yig'ilishda shu va boshqa masalalar muhokama etildi.

Ta'kidlanganidek, mas'ul tashkilotlar xodimlari va hokim yordamchilaridan iborat guruhlar tomonidan korxonalarining hozirgi holati, ular duch kelayotgan muammolar joylarga chiqib chuqur tahlil qilinishi zarur.

Bugungi kunda faoliyat yuritmayotgan, ishlab chiqarish va xizmat ko'rsatish hajmlari kamaygan, tegishli hisobotlarni hajmsiz yuborgan, ish o'rinarini kamaytirgan, soliq to'lovlarini amalga oshirmagan korxonalar bilan bevosita faoliyat yuritayotgan manzilida

o'rganishlar o'tkazilib, yaratilgan yengilliklar va imtiyozlar bo'yicha targ'ibot-tashviqot olib borilishi kerak.

- Faqat shunday amaliyot pirovardida norasmiy ishlayotgan ishchilarni legallashtirish hamda qo'shimcha ish o'rinarini yaratilishiga xizmat qiladi, - dedi E.Turdimov.

- O'rganish davomida kredit mablag'lariga ehtiyoj aniqlanib, tijorat banklari biriktirilishi, qo'shimcha loyihalar aniqlanishi kerak. Toki tadbirkor davlat unga har tomonlama yordam berayotganini, o'z navbatida u ham jamiyat ravnaqida ulushi bo'lishi shartligini anglab yetsin.

Muhokamalar davomida mas'ullar shu kungacha amalga oshirilgan ishlar yuzasidan taqdimot qildi. Ularning har biriga viloyat hokimi tegishli tavsiya va ko'rsatmalar berdi.



Xalq deputatlari viloyat Kengashining QARORI

Samarqand viloyatida 2023-yilda yuridik shaxslar mol-mulk solig'ini hisoblashda ko'chmas mulkning mutlaq qiymatiga qo'llaniladigan kamaytiruvchi koeffitsientlarni tasdiqlash to'g'risida

O'zbekiston Respublikasi Soliq kodeksining 412-moddasi, viloyat davlat soliq boshqarmasi (2022-yil 20-dekabrda 19/10-120148-son) va viloyat moliya bosh boshqarmasining (2022-yil 22-dekabrda 01/02-38-951-son) xulosalariga asoslanib, xalq deputatlari Samarqand viloyati Kengashining oltinchi chaqiriq saxoninchi sessiyasi QAROR QILADI:

1. Samarqand viloyati tumanlarining iqtisodiy rivojlanishiga qarab 2023-yilda yuridik shaxslar mol-mulk solig'ini hisoblashda ko'chmas mulkning mutlaq qiymatiga qo'llaniladigan kamaytiruvchi koeffitsientlar ilovaga muvofiq tasdiqlansin.

2. Viloyat hokimining birinchi o'rinbosari kotibiyati (K.Xushbakov), viloyat moliya bosh boshqarmasi (B.Mirzayev), viloyat davlat soliq boshqarmasi (A.Inagamov) mazkur qarorga asosan 2023-yilda yuridik shaxslarning mulk qiymatiga qo'llanilayotgan kamaytiruvchi koeffitsientlar to'g'risidagi ma'lumotlarni soliq to'lovchilarga yetkazilishini ta'minlasin.

3. Viloyat hokimligi axborot xizmati rahbari - matbuot kotibi (M.Mirzayev), viloyat hokimligi "Axborot-kommunikatsiya va texnologiyalarini rivojlantirish markazi"

(A.Anvarov) ushbu qarorning "Zarafshon" va "Самаркандский вестник" gazetalari-da rasman e'lon qilinishi va viloyat hokimligining rasmiy veb-saytida joylashtirilishini ta'minlasin.

4. Mazkur qarorning bajarilishini nazorat qilish xalq deputatlari viloyat Kengashining Mahalliy budjet, iqtisodiy islohotlarni amalga oshirish, investitsiyalar va tadbirkorlikni rivojlantirish masalalari bo'yicha doimiy komissiyasi (F.Nasrullayev) va viloyat hokimining o'rinbosari (F.Abilov) zimmasiga yuklansin.

5. Ushbu qaror rasmiy e'lon qilingan kundan e'tiboran kuchga kiradi.

Kengash raisi **E.TURDIMOV**

2023-yil 30-yanvar
VI-80-2-7-0-K/23

Yo'qolgan pulni...

IIB xodimi egasiga qaytardi

Viloyat IIB tashkiliy boshqarmada katta inspektori Alibek Ballasov yakshanba kuni odatdagidek oila a'zolari bilan ko'chaga sayrga chiqdi.

- Shodiyona mahallasidagi 107-uy oldidan o'tayotganimizda yerda qo'l sumkasi yotganligini ko'rdik, - deydi Alibek. - Tabiiyki, uni olib, ochib ko'rdim. Qarasam, 8 ming dollar va 50 million so'm pul bor ekan.

A.Ballasov profilaktika inspektorini topdi va ular topilmani belgilangan tartibda hujjatlashtirishdi. Mahalla raisiga uchrab, ichida puli bor qo'l sumkasi topilganligi to'g'risidagi e'lonni telegram guruhlariga joylashtirishdi.

Muayyan muddat o'tgach, Temur

Jamoliddinov ismli shaxs aloqaga chiqdi va sumkacha unga tegishli ekanligini aytdi. Tabiiyki, IIB xodimlari undan sumkaning ko'rinishi, pul miqdori va boshqa belgilarni so'rab olishdi. Temur haqiqatan ham sumkaning egasi ekan. Topilma rasmiy ravishda egasiga topshirildi.

- Uy olish uchun yaxshi niyatda yig'ib yurgan pullarimiz edi, - deydi T.Jamoliddinov. - Qo'l sumkamni qanday tushirib qoldirganimni bilmayman. Yo'qotganimni bilgach esa rosa izlab ko'rdim, undan bundan so'radim, ammo natija chiqmadi. To'g'risini aytsam, uning topilishidan umidimni uzgandim. IIB xodimlari jonimga oro kirishdi. Jamiyatimizda shunday halol, pokiza insonlarning boriga shukur.



Kun qahramoni



OQDARYO da KARRASIGA O'SISH

NIMANING HISOBIDAN AMALGA OSHADI?

Oqdaryo tumanidagi 35 mahallada 165 mingdan ortiq aholi istiqomat qiladi. Hududdan xalqaro yo'l o'tgan, tuman va viloyat markazlari orasidagi masofa 33 kilometr. Bu geografik joylashuv mahsulot yetkazish, xizmatlar sohasini rivojlantirish uchun ham juda qulay.

Hozir tumanda 410 ta sanoat korxonasi faoliyat yuritadi. Yil boshida hududlar toifalarga ajratilganda sharoiti nisbatan qoniqarli bo'lganligi inobatga olinib, Oqdaryo viloyatimiz tumanlari orasida uchinchi toifada qayd etildi. Ammo bu barchasi joyida, degani emas.

Prezidentimiz raisligida 2023-yilning 10-yanvar kuni sanoatni rivojlantirish hamda qo'shimcha xaziralarni aniqlash masalalari bo'yicha o'tkazilgan video-selektor yig'ilishida mamlakat iqtisodiyoti va aholi bandligini ta'minlashda sanoat rivoji muhim ekanligini qayd etdi.

(Davomi 2-sahifada) >>>

YOSHLAR TAKLIFLARI QO'LLAB- QUVVATLANDI

Davlat xavfsizlik xizmati viloyat boshqarmasi boshlig'i A.Axmedov yoshlar muammolarini hal etish va ularning takliflarini eshitish maqsadida bu gal Paxtachi va Narpay tumanlari yigit-qizlari bilan muloqot o'tkazdi.



Yoshlar joylarda sport maydonchalari qurish, shug'ullanishlari uchun sharoit yaratish, IT sohasini rivojlantirish, tadbirkorlik faoliyatini boshlash masalalarida yordam so'radilar.

Jumladan, Paxtachi tumani Xudoyberdi mahallasida yashovchi Adham Shodmonov mahallada tashkil qilgan avtomobil ta'mirlash ustaxonasini rivojlantirish bo'yicha murojaat qildi va uning ustaxonasiga DXX viloyat boshqarmasi tomonidan kerakli asbob-uskunalar yetkazib beriladigan bo'ldi.

Tumanning Sardoba mahallasida istiqomat qiluvchi Barot Tojiyev tengdoshlarining bo'sh vaqtini mazmunli o'tkazish, kibersportni rivojlantirish va kompyuter savodxonligini oshirish maqsadida kompyuter jamlanmalari so'radi. Uning taklifi qo'llab-quvvatlanib, Yoshlar ishlari agentligi viloyat boshqarmasi tomonidan amaliy ko'mak berilishi ma'lum qilindi.

Narpaydagi shunday uchrashuvda yoshlar yetakchilari tomonidan murojaatlar ko'p bo'ldi. Umid mahallasi yoshlar yetakchisi Bekmurod Nurmurodov tumanda kurash sport maktabi qurish bo'yicha qilgan murojaati atroflicha o'rganib chiqiladigan bo'ldi. Shuningdek, Muqimiy mahallasi yoshlar yetakchisi O'tkir Avazovning tuman markazidagi bo'sh turgan binoni yoshlar markaziga aylantirish haqidagi murojaati yuzasidan tuman mutasaddilari masalani o'rganish va ijobiy hal qilish uchun ko'rsatma berildi.

Uchrashuvlarda ikkala tuman yoshlarini qiyab kelayotgan ko'plab muammolarga yechim topildi. Tashabbus va g'oyalari ma'qullanib, muddat talab qiladigan muammolarni o'rganish mutasaddilar zimmasiga yuklandi.

Uchrashuv so'ngida yoshlarga kitoblar jamlanmasi tarqatildi.

